

增訂徐文定公集目錄

卷首上

本傳……………一

年譜……………三

誥命一……………九

誥命二……………十

誥命三……………十二

誥命四……………十三

卷首下

文定公行實……………一

附壽文二……………四

卷一

附利子奏疏	九
附利子碑記	十三
附墓誌銘	四十五
耶穌像贊	一
聖母像贊	一
正道題綱	一
規誠箴贊	三
十誠箴贊	三
克罪七德箴贊	四
眞福八端箴贊	四

哀矜十四端箴贊	五
俞子如先生像贊	五
先祖事畧	六
先祖妣事畧	七
先考事畧	八
先妣事畧	九
與焦老師書	十一
與海翁夫子書	十二
答鄉人書	十三
跋二十五言	十四
幾何原本序	十六
簡平儀說序	十八

泰西水法序	二十
刻同文指算序	二十二
題測量法	二十五
句股義序	二十六
焦氏澹園續集序	二十九
陽明先生批武經序	三十一
自笑札	三十三
夏初札	三十四
壘吹羅附	三十五
賦得玉壺冰	三十七
題陶士行運甓圖歌	三十七
邊塞苦寒吟	三十八

雨霽望西山……………三十九
賦得草色遙看近若無……………三十九

卷二

屯田疏稿……………一
墾田第一……………二
用水第二……………十六
除蝗第三……………五十二
禁私鹽第四……………三十六
曬鹽第五……………四十四
處置宗祿查核邊餉議……………十一
漕河議……………二五十八

海防迂議……………七十九

卷三

勅諭練兵……………一

城守條議……………二

記崇禎二年十一月初四日事……………六

記崇禎二年十一月二十八日事……………九

再陳一得以裨廟勝疏……………十

控陳迎銃事宜疏……………十二

破敵之策甚近甚易疏……………十六

醜虜暫東綢繆宜亟謹述初言以備戰守疏……………十八

聞風憤激直獻芻蕘疏……………二十三

西洋神器既見其益宜盡其用疏	二十七
恭報教演日期疏	三十
鎮臣驟求製銃謹據職掌疏	三十二
欽奉明旨謹陳愚見疏	三十三
欽奉聖旨復奏疏	三十六
處不得不戰之勢宜求必戰必勝之策疏	三十八
欽奉明旨敷陳愚見疏	四十二
附李之藻奏爲制勝務須西銃乞勅速取疏	五十一
崔景榮等奏爲制勝務須西銃敬述購募始末疏	五十六
復某中丞書	五十九
大征策	六十
器勝策	六十一

服戎策……………六十四

卷四

諭督領改修曆法勅……………一

禮部爲奉旨修改曆法開列事宜乞裁疏……………三

內閣題覆欽天監推算日食前後刻數不對疏……………十一

禮部爲日食刻數不對請勅部修改疏……………十一

禮部題爲奉旨修改曆法開列事宜乞裁疏……………十五

條議曆法修正歲差疏……………十六

奉旨修改歷法開列事宜乞裁疏……………二十五

修改曆法疏……………二十八

奉旨回奏疏……………二十九

因病再申前請以完大典疏	三十四
奏呈曆書總日表	三十七
奉旨恭進曆書疏	四十二
奉旨續進曆書疏	四十三
日食分數非多畧陳義據以待候驗疏	四十五
日食疏	五十
月食依法推步具圖呈覽疏	五十三
月食疏	五十六
奉旨恭進第三次曆書疏	五十八
爲月食具圖呈覽乞測驗施行疏	六十
月食乞照前登臺實驗疏	六十三
奉旨測候月食無憑測驗	六十五

月食先後各法不同緣由及測驗二法疏	六十六
修曆缺員謹申前請以竣大典疏	七十二
治曆已有成模懇祈恩叙疏	七十五
李天經遵旨任事謹陳題薦始末疏	七十七
李天經題爲書器告成謹照原題查叙在事諸臣疏	八十
李天經題爲恭懇破格柔遠疏	八十二
李天經題爲代獻芻蕘以裕國儲疏	八十四
李天經題爲遵旨續進坤輿格致	八十六
修改曆法請訪用湯若望	八十九
奏爲月食事	九十一
曆法修正告成書器繕治有待請以李天經任曆局	九十四
進繳勅印開報錢糧	九十六

卷五

辨學章疏……………一

自陳不職乞賜罷斥疏……………八

再瀝血誠辨明冤誣疏……………九

敬陳講筵事宜以裨聖學政事疏……………十一

遵例引年懇乞休致疏……………十四

衰病實深懇賜罷斥疏……………十六

考課無能乞允辭免疏……………十八

恭謝天恩疏……………二十

恭謝頒賜疏……………二十一

卷六 附李之藻文稿

天主實義重刻序	一
渾蓋通憲圖說序	三
畸人十篇序	六
同文算指序	八
圓容較義序	十
刻職方外紀序	三
譯寰有詮序	六
睡畫二答引	九
刻天學初函題辭	二十
刻聖水紀言序	二十一
請譯西洋曆法等書疏	二十四
謹循職掌議處城守軍需以固根本疏	二十九

鑄錢議……………四十七

黃河濬塞議……………三十九

山海關西虜撫賞議……………三十六

補卷一日錄

題歲寒松柏圖……………三十六

曲水流觴……………三十九

上苑聽新鶯……………四十

南郊陪祀有述二首……………四十

增訂徐文定公集卷五

辨學章疏

萬曆四十四年七月

左春坊左贊善兼翰林院檢討臣徐光啓謹奏爲遠人學術最正。愚臣智見甚真。懇乞聖明。表章隆重。以永萬年福祉。以貽萬世乂安事。臣見邸報。南京禮部參西洋陪臣龐迪我等。內言其說浸淫。卽士大夫亦有信向之者。一云妄爲星官之言。士人亦墮其雲霧。曰士君子。曰士人。部臣恐根株連及。畧不指名。然廷臣之中。臣嘗與諸陪臣講究道理。書多刊刻。則信向之者臣也。又嘗與之考求曆法。前後疏章具在御前。則與言星官者亦臣也。諸陪臣果應得罪。臣豈敢幸部臣之不言以苟免乎。然臣累年以來。因與講究考求。知此諸臣最真最確。不止踪跡心事一無可疑。實皆聖賢之徒也。且其道甚正。其守甚嚴。其學甚博。其識甚精。其心甚真。其見甚定。在彼國中亦皆千人之英。萬人之傑。所以數萬里東來者。蓋

彼國教人。皆務修身以事上主。聞中國聖賢之教。亦皆修身事天。理相符合。是以辛苦艱難。履危蹈險。來相印證。欲使人人爲善。以稱上天愛人之意。其說以昭事上帝爲宗本。以保救身靈爲切要。以忠孝慈愛爲工夫。以遷善改過爲入門。以懺悔滌除爲進脩。以升天真福爲作善之榮賞。以地獄永殃爲作惡之苦報。一切戒訓規條。悉皆天理人情之至。其法能令人爲善必真。去惡必盡。蓋所言上主生育拯救之恩。賞善罰惡之理。明白真切。足以聳動人心。使其愛信畏懼。發於絲衷故也。臣嘗論古來帝王之賞罰。聖賢之是非。皆範人於善。禁人於惡。至詳極備。然賞罰是非。能及人之外行。不能及人之中情。又如司馬遷所云顏回之夭。盜跖之壽。使人疑於善惡之無報。是以防範愈嚴。欺詐愈甚。一法立。百弊生。空有願治之心。恨無必治之術。於是假釋氏之說以輔之。其言善惡之報。在於身後。則外行中情。顏回盜跖。似乎皆得其報。謂宜使人爲善去惡。不旋踵矣。奈何佛教東來千八百年。而世道人心。未能改易。則其言似是而非也。說禪宗者。

衍老莊之旨。幽逸而無常。行瑜迦者。雜符籙之法。乖謬而無理。且欲抗佛而加於上主之上。則既與古帝王聖賢之旨悖矣。使人何所適從。何所依據乎。必欲使人盡爲善。則諸陪臣所傳事天之學。真可以補益王化。左右儒術。救正法佛也者。蓋彼西洋鄰近三十餘國。奉行此教。千數百年。以至於今。大小相卹。上下相安。路不拾遺。夜不閉關。其久安長治如此。然猶舉國之人。兢兢業業。惟恐之失墜。獲罪於上主。則其法實能使人爲善。亦既彰明較著矣。此等教化風俗。雖諸陪臣自言。然臣審其議論。察其圖書。參互考稽。悉皆不妄。臣聞絲余西戎之舊臣。佐秦興霸。金日磾西之世子。爲漢名卿。苟利於國。遠近何論焉。又見梵刹琳宮。遍布海內。番僧喇嘛。時至中國。卽如回回一教。並無傳譯經典。可爲証據。累朝以來。包荒容納。禮拜之寺。所在有之。高皇帝命翰林臣李紳吳伯宗。與回回大師馬沙赤黑馬哈麻等。翻譯曆法。至稱爲乾方先聖之書。此見先朝聖意。深願化民成俗。是以褒表搜揚。不遺遠外。而釋道諸家。道術未純。教法未

備。二百五十年來。猶未能仰稱皇朝表章之盛心。若以崇奉佛老者。崇奉上主。以容納僧道者。容納諸陪臣。則興化致理。必出唐虞三代上矣。皇上象養諸陪臣一十七載。恩施深厚。諸陪臣報答無階。所抱之道。所懷之忠。延頸企踵。無繇上達。臣既知之。默而不言。則有隱蔽之罪。是以冒昧陳請。倘蒙聖明採納。特賜表章。目今暫與僧徒道士。一體容留。使敷宣勸化。竊意數年之後。人心世道。必漸次改觀。乃至一德同風。翕然不變。法立而必行。令出而不犯。中外皆勿欺之。臣比屋成可封之俗。聖躬延無疆之遐福。國祚永萬世之太平矣。倘以臣一時陳說。難可遽信。或恐旁觀猜忖。尙有煩言。臣謹設爲試驗之法有三。處置之法有三。併以上請。試驗之法其一。盡召疏中有陪名臣。使至京師。乃擇內外臣僚數人。同譯西來經傳。凡事天愛人之說。格物窮理之論。治國平天下之術。下及曆算醫藥農田水利等。興利除害之事。一一成書。欽命廷臣共定其是非。果係叛常拂經。邪術左道。卽行斥逐。臣甘受扶同欺罔之罪。其二。諸陪臣之言。與

儒家相合。與釋老相左。僧道之流。咸共憤嫉。是以謗害中傷。風聞流播。必須定其是非。乞命諸陪臣。與有名僧道。互相辨駁。推勘窮盡。務求歸一。仍令儒學之臣。共論定之。如言無可采。理屈辭窮。卽行斥逐。臣與受其罪。其三。書譯若難就緒。僧道或無其人。卽令諸陪臣。將教中大意。誠勸規條。與其事蹟功效。略述一書。并已經翻譯書籍三十餘卷。原來本文經典一十餘部。一併進呈御覽。如其躋駁悖理。不足勸善戒惡。易俗移風。卽行斥逐。臣與受其罪。此三者試驗之法也。處置之法。其一。諸陪臣所以動見猜疑者。止爲盤費一節。或疑燒煉金銀。或疑洋商按濟。皆非也。諸陪臣旣已出家。不營生產。自然取給於措施。凡今衣食。皆西國捐施之人。展轉託寄。間遇風波盜賊。多不獲至。諸陪臣亦甚苦之。然二十年來不受人一錢一物者。蓋恐人不見察。受之無名。或更以設騙科歛等項罪過相加。且交際往來。反多煩費故耳。爲今之計。除光祿寺恩賜錢糧照舊給發外。其餘明令諸陪臣量受捐助。以給衣食。足用之外。義不肯受者。聽

從其便。廣海洋商。諭以用度既足。不得寄送。西來金銀。仍行關津嚴查阻回。如此音耗斷絕。盡釋猜嫌矣。其二。諸陪臣所居地方。不擇士民。不論富貴貧賤。皆能實心勸化。目今宜令隨其所在。依止焚修。官司以禮相待。使隨人引掖。或官司未能相信。令本地士民擇有身家行止者。或十家。或二十家。同具一甘結在官。如司教之人。果有失德猥行。邪言妄念。表率不端者。依今部議放流遊逐。甘結諸人。一體科坐。其無人保結者。不得容留。若他人有以違犯事理。傳聞告言者。官司亦要體訪的確。務求實跡。則掩飾難容。真偽自見矣。其三。地方保舉。倘有扶同隱匿。難以遽信。再令所在官司。不時備細體察。除有前項違犯。登時糾舉外。其道行高潔。地方士民。願從受教者。有司給與刷信文簿二扇。令司教者。循環報數在官。年終。正印官備查從教人衆。曾否犯有過惡。問有罪名。另籍登記。三籍總行考察。如從教人衆。一無過犯。兼多善行可指。正印官於司教之人。優行嘉獎。如從教者作奸犯科。計其人之衆寡。罪之輕重。甘結士

民。量行罰治。若從教之人。故犯罪惡。司教同教。戒勸不悛。因而報明官司。除其教籍者。或教籍未除。而同教之人。自行出首者。或過犯在從教以前。事發在後者。罪止本身。同教之人。並不與坐。如此官府有籍可稽。諸人互相覺察。不惟人徒寡少。仍於事體有益。其他釋道諸人。或爭論教法。更不必設計造言。希圖聳聽。只須分民司教。亦同此法。考察賞罰。誰是誰非。孰損孰益。久久自明矣。此三者。處置之法也。已上諸條。伏惟聖明裁擇。如在可采。乞賜施行。臣於部臣爲衙門後輩。非敢抗言與之相左。特以臣考究既詳。灼見國家致盛治。保太平之策。無以過此。倘欽允部議。一時歸國。臣有懷不吐。私悔無窮。是以不避罪戾。齋沐陳請。至於部臣所言風聞之說。臣在昔日。亦曾聞之。亦曾疑之矣。伺察數歲。臣實有心窺其情實。後來洞悉底裏。乃始深信不疑。使其人果有纖芥可疑。臣心有一毫未信。又使其人雖非細作奸徒。而未是聖賢流輩。不能大有裨益。則其去其留。何與臣事。修曆一節。關係亦輕。臣身爲侍從之臣。又安

敢妄加稱許。爲之游說。欺罔君父。自干罪罰哉。竊恐部臣而伺察詳盡。亦復如臣。其推獎許。亦不後於臣矣。臣干冒天威。不勝惶恐待命之至。

萬曆四十四年。御批知道了。

自陳不職乞賜罷斥疏

崇禎元年

太子賓客禮部右侍郎兼翰林院侍讀學士臣徐光啓謹奏爲自陳不職。懇乞聖明。特賜罷斥。以重計典事。該吏部題奉欽依六年考察在京官員。叨列三品。例應自陳。臣以萬曆三十二年進士。改翰林院庶吉士。授本院檢討。累陞左春坊左贊善詹事府少詹事。以至今官。臣一介庸流。行無足算。幸遇清時。歷叨宮筮。適東鄙阡危之日。荷皇祖特達之知。俾釋鉛槧而躬韎韐。結戒備器。未及受命前軀。乏餉撤兵。仍復厠身華貫。已晉銜於卿貳。旋被構於權璫。賴先典之明清。獲從寬典。屬聖明之在宥。忝預賜環。備位經緯。再參史局。未見開陳之益。可裨

高深。遽成優叙之恩。有踰涯分。念卽英賢際此。猶虞福過爲災。矧以譴劣居之。安免食浮之恥。且顧惟衰朽。已自擬於懸車。而際此澄清。復何辭於褫帶。如臣癯曠。幽黜宜先。伏乞皇上勅下該部。將臣罷斥。俾弛擔負。歸老林泉。庶幾愚分獲安。而大典益肅矣。臣不勝激切仰懇待命之至。

再瀝血誠辨明冤誣疏

崇禎年元

太子賓客禮部右侍郎兼翰林院侍讀學士臣徐光啓謹奏爲自陳不職。蒙恩留用。謹再瀝血誠。辨明冤誣。仍祈罷斥。以安愚分事。臣近因計典。具疏自陳。奉聖旨徐光啓日侍講讀。學問素優。着照舊供職。吏部知道欽此。臣恭奉明綸。不勝感激。因逢大慶。業已報名廷謝。隨班朝賀。但今日講伊始。在臣情事。有與諸臣獨異者。以臣昔年曾經環召。卽聖明瀚雪之恩。而銜所誣臣者尙在六年之內。臣又未嘗一言自理。其敢藉口恩綸冒昧就列乎。以此再懇天恩。乞賜褫斥。至

被誣事情。謹辨晰一二以祈聖鑒。按鈺疏中論列。止臣練兵一事。除一切虛詞諛語。臣無可辨。亦不必辨者。不敢枚舉外。其所指陳。獨有逃兵買免一節。以爲實事。不知兵非臣所召募之兵。而臣未受事以前。山陝河南僉派之民兵也。良民不習兵革。又雇覓亡賴以充之。安得無逃。逃者百之一二。且逃而勾。勾而必至臣之法未廢也。其既至而放回者。則泰昌元年十一月奉旨汰兵八分之三。事竣之日。卽已題知冊報部科矣。是後復有逃兵解到者。已在存留冊額之外。不得不放回故也。然止一月之內。解到押回者不過數名。爲簡汰得旨之日。卽已移文三省。悉停勾解。所云解到數人者。其咨文未到。已發在途者耳。且鈺疏言有司費多少精神。戶丁受多少賠累。始得清勾一軍。夫費精神。受賠累者。爲本犯押役之盤費也。若盤費之外。又爲設處買免多金。一時有司戶丁。安得愚謬至此乎。若本犯自有多金。自逃自解。又何必費精神受賠累乎。是則數言之間。亦已自相矛盾矣。至臣之陞職。奉皇祖特旨。而四品京官。又無辭免之例。且暫作糠粃。旋

爲砂礫。由後觀前。臣豈有意求之乎。盜餉之說。憑空着此二字。向使臣有分毫差錯。鋌亦何愛於臣。不一指實邪。總由臣與故輔魏廣微。以文字語言。因懷伎害。秉政之日。數與人言。促臣赴任。而臣年餘不至。謂臣不入牢籠。故臣不免耳。然自惟通籍二十六年。悉成瘵曠。練兵一事。雖兢兢黽勉。實亦未著勞績。緬懷尸素。褫斥允宜。伏祈聖明。准依前請。特賜罷免。臣雖跼伏田里。有餘幸矣。臣無任懇切惶恐待命之至。爲此具本親賚。謹具奏聞。

敬陳講筵事宜以裨聖學政事疏

崇禎元年九月初二日

經筵講官禮部右侍郎徐臣光啓謹奏爲感恩圖報。思效芻蕘。敬陳講筵事宜。以裨聖學聖政事。臣忤權被斥。久安廢棄。荷蒙召用。備員講幄。感德銘鏤。捐糜匪報。自惟文學侍從之臣。獨於經史典故中。能以一得自效。庶免詩人素餐之誚也。臣竊見日講規則。稍似東宮舊儀。用之今日。未爲宜稱。蓋我皇上睿資

天縱・聖學夙成・吐詞爲經・立儀成範・所講經書及通鑑寶訓數條・一覽可盡・而自辰及申・殆將半日・恐裨益少而光陰多矣・時事艱虞・每厯宵旰・披覽商求・寸晷可惜・職竊謂四書書經・宜分派節段・令職等撰述簡明講章・其中果有關切・不妨開陳・如或不然・無須求備・寶訓事詞明白・或可不煩講解・并通鑑亦派定節段・至日・於御前宣講一遍・遇有疑義・願垂清問・若理涉淵微・職等淺陋・不能盡解・聽携本書傳注等・查明奏對・既經問辨・闕發必多・其無疑者・片時可竟・似於聖學工夫省而有益・至若一應章奏・初於平臺召對・近於文華商確・仰見聖衷求治甚殷・誰敢不矢心殫竭者・但事體不同・或有一覽可決・或如屯田鹽法河漕水利等事・中多古今沿革・利弊因緣・必須備細考求・精加參酌・倘於旬月之間・得一必然之畫不啻足矣・而欲求一見便明・片言卽決・其將能乎・職請增置講官數員・更番入直・仍以文華門外・直房一二間爲書庫・量將秘閣書籍・移入其中・專官掌理・其諸臣有藏書・欲資參考・亦聽携入・遇有前項重

難事情。必須援古証今。及按據國朝典故者。欽命閣臣輪值。諸備臣細尋求考索。務須核實簡明。編次成章。閣臣據此甄裁詳定。或於本日。或次日。其繁難者不妨多日。擬議進呈。仰候宸斷。如此每遇一事。必然確有定據。綽有成畫。不過浹歲之間。天下要務。畧如指掌。更益以羣臣建白。久而勒成一書。其裨益聖政匪淺渺矣。且方今造就人才。務求實用。行臣之說。天下皆知上意所註嚮。人務博通以稱任使。數年以後。才不勝用。而文體官方。亦將翕然改觀。救時急務。似當出此。如蒙皇上俯賜採擇。乞勅閣臣詳議具奏施行。臣冒昧瀆陳。無任隕越待命之至。

崇禎元年九月初二日奏。

本月初九日奉旨覽奏條陳講筵事宜。具見忠愛。寶訓日進三條。不必註解。遇有疑義。特加剖析。朕召對商確。原爲修舉實事。各衙門若欽遵會典一書。著實舉行。自有成效。不須另輯。該部知道。

遵例引年懇乞休致疏

崇禎四年三月初九日

禮部尙書兼翰林院侍讀學士臣徐光啓謹奏爲遵例引年。懇乞聖明。俯容休致。以免曠職事。職直隸松江府上海縣人。中萬曆三十二年進士。歷任今職。伏念職一介腐儒。遭逢盛世。躡塵華貫。尸素兢慚。中間忤權被斥。復幸賜環。兩歲三選。更叨加俸。恩覃奕世。榮遇踰涯。屢蒙任使。全無稱塞。而賞賚優厚。晉錫頻繁。撫己捫心。實願捐糜頂踵。圖報萬分之一也。不幸夙膺狗馬之疾。日漸衰頹。今年滿七十矣。伏讀大明會典內一款。凡內外大小官員年七十者。聽令致仕。明例昭然。職之年事。政與例合。而况多膺疾病。與筋力未衰者不同。伏望聖慈。俯容照例休致。倘首邱得遂。深銜帷蓋之恩。若歲月少延。益荷生全之賜矣。再職之所請。既符明例。卽於歲首。便合陳情。所以遲遲累月者。因昨年自請往調澳商。伏蒙聖旨諭留。題差原任中書姜雲龍。押送教士陸若漢等廻住。後

雲龍被議。職實未知。其在廣事情。若果於錢糧染指。職宜膺不適之罰。是用遷延。伏候譴斥。今據廣東巡按臣高欽舜報疏稱督臣差通判祝守禧齋發安家行月糧等銀。至澳給散。則雲龍身不入澳。銀不經手。讀據陸若漢奏稱通判祝守禧領布政司原封銀兩到澳。唱名給散等因。語亦相符。蓋調兵造器給糧等項。皆督按道府諸臣。以地方官行地方事。雲龍不過督役催促。其於俵散錢糧。卽欲與聞。亦理勢之所無也。今若漢疏仰奉明旨。恩賚有加。其疏內事情。已蒙聖鑒。卽督按諸臣勘疏到日。亦與前疏當無異同。臣仰徵聖恩。亦或可從末減。是以敢申情事。

• 上瀆天聽。伏惟聖明垂慈。若職見管修曆事務。臣於舊年十二月奏請簡用人員。奉聖旨審曆非比他藝。果有精曉堪任的。着禮吏二部擇用。不得假徇。取到人員。知道了。該衙門知道欽此。合候都覆接管。以完大典。昔祖神之造大明曆。而子暉修之。王徇首造授時曆。而郭守敬成之。蓋事繁時久。諒非臣衰邁之身所可竟也。并希聖明裁察。臣不勝哀懇祈望待命之至。

崇禎四年三月初九日

本月十二日奉旨卿清淡端慎。精力正優。詞林允資模範。不止修曆一事。着安心供職。不必引陳。其澳商事情。已有旨了。該部知道。

衰病實深懇賜罷斥疏

太子太保禮部尙書兼文淵閣大學士臣徐光啓謹奏爲衰病實深。人言波及。懇乞聖明。亟賜罷斥。以無誤政本事。臣猥以迂疎。遭逢聖主。擢居揆地。實不克勝。加以年逾七旬。尤多疾疢。心思耳目。俱見衰殘。時省曠瘼。冰兢淵凜。自崇禎三年六月二十四日。伏蒙聖恩陞授禮部尙書。扣至今年六月二十三日。通曆正二品俸三十七個月。知遇彌隆。罪戾彌積矣。伏讀大明會典一欵。凡京官年七十以上。不論三六九年考滿。俱不考覈。行令致仕。係堂上官。亦不引奏。特具本奏請。取自上裁。此則典制有恆。宜從簡絀。况近奉俞旨。推補閣員。抑又羣

賢連茹之秋。驚駘息肩之日也。頃以同官諸臣。出入參差。未敢過部具疏申請。昨入直看詳。見刑部都給事中陳贊化。爲狡弁蓄謀等事。以舊輔周延儒故。刺及於臣。謂在綸扉者。有同鄉密友。授衣鉢而思代爲反噬。所云同鄉者臣也。臣與延儒。雖同朝二十載。詞林前後。例少往還。獨己巳之歲。並佐禮曹。然延儒終歲杜門。臣亦拮据任使。仍落落不相及也。去歲誤蒙簡命。乃始朝夕共事。於時幾務之間。臣所迷者十三。既每資其匡引。臣所得者十一。亦自效於劑調。實不敢開玄黃水火之端。顧豈敢爲阿私朋比之事哉。臣生平愚見。每謂植黨爲非。渙羣爲是。是以孑然孤踪。東西無著。苟利社稷。矢共圖之。有何衣鉢。相傳何用。至於人臣留去。莫非主恩。延儒之行。恩禮備至。臣未見其宜與贊化爲讎也。卽如今日。抨彈見及。臣得因此遂果私衷。獲安愚分。感於不暇。何讎之有。己則不讎。而代人讎乎。又代人報乎。聖明在上。日月高懸。似可以無辨。然念時事多艱。每厪宵旰。輔理之臣。非長材強力。何堪久任。臣無識無學。實病實衰。

·已過懸車之期·仍屆黜幽之會·伏望我皇上俯垂慈允·卽賜罷斥·使躡鼎無虞於覆餗·老馬不至於僨轅·在聖朝率由舊章·而所裨於政地者多·所全於微臣者大矣·臣不勝祈懇悚慄待命之至·

崇禎六年七月日

本月十六日奉聖旨卿忠誠勤恪·精力正優·朕方切倚任·浮言狂悖·何待剖陳·閣務殷煩·着卽日入直佐理·以慰眷注·慎勿少稽·該部知道·

考課無能乞允辭疏

太子太保禮部尙書兼文淵閣大學士臣徐光啓謹奏爲考課無能·隆恩難冒·伏乞聖明·特允辭免·以安愚分事·臣以二品三年考滿·該吏部題奉聖旨·徐光啓簡任密勿·協贊忠誠·茲當滿考·勞績茂著·着復職加太子太保文淵閣大學士·尙書如故·蔭一子中書舍人·照新銜給與應得誥命·欽此·臣聞命自天·不勝傍

惶感悚。伏念臣通稽三紀。在告七年。叨蒙聖鑒。起自田間。洊歷卿貳。簡拔今官。皇上之恩。不可勝量。微臣之幸。不可勝慙。三年以來。曠官尸祿之咎。不可勝紀。主爵之吏。循例具請。天錫之寵。渝分有加。竊惟揆度所司。實惟政本。三載考幽而黜。七十日老而傳。匪止經言。亦惟今典。臣一介疏庸。四朝知遇。憶昔備員講幄。已貽蚤負之譏。茲且謬列贊襄。益切鵜梁之愧。在皇上海嶽崇深。或塵流概納。聖神函蓋。卽葑菲不遺。但臣燭武之年云老。蹇叔之力旣愆。修改曆書。方驚竭於此事。看評章疏。復駭窮於後塵。耳目肢體。悉露衰殘。志氣精神。日趨倦憊。當此省成之日。正應澄汰之期。皇上寬其註誤。免其罪愆。已荷聖德之如天。彌惕報稱之無地。何復徇以不可循之故典。假以非所望之厚恩。宮階上筮乎孤卿。命秩兼施乎累世。豈所以全臣愚而彰風勵哉。三復溫綸一字一汗。不得不備瀝循牆之悃。轉圜之聽。伏望皇上俯察愚誠。毫無矯飾。收回新命。俾緩躋巔。還耕食藜飲之素心。戴舜日堯天於永世。在微臣安疎拙之涯分。

不過一己之私。在朝端慶政地之肅清。是則天下之福也。臣無任啣恩激切。祈懇待命之至。

崇禎六年七月二十五日

二十六日奉聖旨。卿深資夙望。忠著新猷。考績加恩。原屬彝典。宜祇遵成命。不必遜辭。該部知道。

恭謝天恩疏

崇禎六年七月

禮部尙書兼文淵閣大學士臣徐光啓謹奏爲恭謝天恩事。本月二十五日。伏蒙聖恩。以臣歷二品俸三年考滿。特遣御前牌子李天祥齎賜原封鈔二千貫。羊一隻。酒十瓶。臣謹焚香叩頭。祇領訖。伏念臣猥以孱庸。濫塵密勿。傾葵向闕。初無補於天工。啜菽隨班。祇自深其內疚。會茲考績。顯候黜幽。乃荷皇仁。更隆寵錫。牲醪維旅。流甘旨於天庖。寶鑑累千。分環奇於御府。重撫躬而愧惕。謹

稽首以登嘉。自非俯竭股肱。何以仰酬高厚。志忘溫飽。終愧調羹作醴之未能。戒在滿盈。益切食孽含冰而自勵。臣不勝感激天恩之至。爲此謹具本奏謝以聞。

恭謝頒賜疏

崇禎六年九月

太子太保禮部尙書兼文淵閣大學士臣徐光啓謹奏爲恭謝天恩事本月二十二日欽蒙聖恩。以臣患病。特遣御前牌子趙進。頒賜臣鮮豬一口。鮮羊一羴。白米二石。酒十瓶。甜醬瓜茄子一罇。臣謹於私第恭設香案。扶掖行禮。臣領訖。伏念臣賦體素弱。積疾甚深。竭蹶經年。愧調羹之乏術。優游玩日。慙作醴之未能。垂老馳驅。正值技窮於莫展。浹旬賜假。方深眷恤於優容。未克爲國分憂。乃荷自天寵錫。爰勤中使。誕沛恩膏。分桂醕以浮香。載備脂肥之俎。啓芝囊而投粲。兼羸肴藪之芳。鏤骨冰兢。銘心感溢。敢不刻期入直。仰報皇恩。實緣強起未能。俯滋愚悚。茲因陳謝宸嚴之際。更思籲請君父之前。伏冀聖明。容臣寬假調

理・倘未遵填於溝壑・倘思圖報於彤庭・臣不勝激切感戴之至・爲謹奏謝以聞・